

**Bukti PM komited kembang syiar Islam  
Utusan Online  
07 April, 2012**

PUTRAJAYA 6 April - Peruntukan lebih RM211 juta yang diumumkan Perdana Menteri, Datuk Seri Najib Tun Razak untuk pembangunan Islam di Wilayah Persekutuan Kuala Lumpur menunjukkan beliau begitu komited mengembangkan syiar agama itu.

Pendapat berkenaan diutarakan ahli jawatankuasa (AJK) surau Pangsapuri Indralok di Pantai Dalam, Sabri Pandak, 37 tahun.

Beliau yang ditemui pada majlis Perhimpunan Perdana Warga Agama/Qaryah bersama Perdana Menteri itu berkata, usaha murni Najib itu juga memperlihatkan kesungguhan Perdana Menteri untuk terus memelihara kesucian agama Islam di negara ini.

"Perdana Menteri tidak terlepas pandang untuk memberikan peruntukan memastikan kawasan masjid dan surau menjadi lebih ceria biarpun hanya melibatkan kawasan komuniti yang lebih kecil.

"Terima kasih saya ucapkan kepada Perdana Menteri kerana kami boleh melakukan ibadah dan aktiviti agama di surau dalam keadaan lebih selesa selepas ini," kata bendahari surau pangsapuri tersebut, di sini hari ini.

Sementara itu, seorang guru agama, Siti Mokhlisah Basiran, 47, berkata, peruntukan untuk bidang pendidikan agama itu memberi semangat untuknya memberikan yang terbaik kepada para pelajar.

"Saya rasa begitu berdedikasi untuk terus memberikan pendidikan Islam terbaik kepada anak murid saya.

"Saya berharap, peruntukan memperkasakan agama Islam akan terus diadakan pada masa akan datang," kata guru Sekolah Rendah Agama (SRA) Sungai Mulia, Jalan Gombak itu.

Bagi Noriah Basir, 59, pemberian peruntukan untuk membangunkan kemudahan agama Islam di kawasan Wilayah Persekutuan perlu terus diadakan pada masa akan datang.

"Terima kasih kepada Perdana Menteri di atas pengumuman beberapa peruntukan tadi," kata guru agama Kelas al-Quran dan Fardu Ain (KAFA) Nurul Muttaqin, Gombak, Kuala Lumpur itu.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0407&pub=Utusan\\_Malaysia&sec=Dalam\\_Negeri&pg=dn\\_02.htm](http://www.utusan.com.my/utusan/info.asp?y=2012&dt=0407&pub=Utusan_Malaysia&sec=Dalam_Negeri&pg=dn_02.htm)